

## **Verjiun cörta dla Convenziun di dërc di mituns**

### **Prinzip 1**

Te desses avèi düc i dërc dá dant te chësta detlaraziun, belanfat da olache te vëgnes, ci corú dla pel che te as, sce te es n möt o na möta, ci lingaz che te baies, te ci religiun che te crëies, ci minunga che te as y tan rich che te es. Döt chësc vel sides por te co por túa familia.

### **Prinzip 2**

Te as le dërt da ciafé na sconanza particolare, la lege mëss se fistidié che te pois crësce sò sann y lëde. La lege á le dovèi da tigní cunt de ci che é le miú por te!

### **Prinzip 3**

Tl momënt che te nasces aste le dërt da ciafé n inom y la portignënza a na nazion.

### **Prinzip 4**

Te as le dërt da crësce sò sann. Porchël desseste tö y túa uma gní sconá te na manira particolare, implü dess uma y möt gní curá aladô, sides dan co do la nasciüda. Te as le dërt da ciafé assá da mangé, da avèi n quartier, da podèi palsé y ciafé l'assistënza di doturs, sce te l'adores.

### **Prinzip 5**

Sce te as n impedimënt mental y/o fisich, ciafeste n tratamënt y na educaziun particulars y an ciarará de te tignin cunt de düc tü bojëgns.

### **Prinzip 6**

Por che te pois crësce sò indertöra adoreste l'amur y la comprenjiun di atri. Sce ara vá n püch, chersciaraste sò pro tü geniturs, sce ara ne vá nia, te vigni caje te n ambiënt olache te ciafes afet y olache an ciara de túa segurëza. Sce te es ciamó dër pice ne poste nia gní destaché da túa uma, ater co sce ara ne vá nia atramënter. Les istituziuns publiches mëss se fistidié extra bun di püri mituns y de chi zënza familia. Le stat mëss sostigní finanziaiamënter les families cun tröc mituns.

### **Prinzip 7**

Te as le dërt da podèi frequenté na scora, almanco la scora elementara y te ne as bria da paié nia por chësc. L'insegnamënt dess te dé la poscibilité da svilupé tü talënc y túa capacità de iudize. Te desses imparé da surantó responsabilité, por gní na pert de valüta dla comunité. Düc chi che é responsabli de túa educaziun mëss agí le miú che ara vá aladô de tü bojëgns. De chësc él imprömededöt tü geniturs che mëss se fistidié. Te as le dërt da fá belaita y da palsé. Les autorités á le dovèi da le promöie.

### **Prinzip 8**

Te caji de emergënza mësseste tres ester danter i pröms che ciafa sconanza y aiüt.

### **Prinzip 9**

Te mësses gní stravardé dala trascuratëza, implü ne pó degügn ester ri o crödi cun te y te sfruté. Degügn ne pó te adoré por val' sort de comerz. Te pos impormó lauré canche te as arjunt na certa eté. Te ne pos nia gní sforzé da ademplí na ativité che podess ester de dann por túa sanité o che podess ostacolé to svilup.

### **Prinzip 10**

Degügn ne pó te sburlé da araté damanco de atres porsones porvia de sciöche ares ciara fora, porvia de súa provegnënza, súa cultura, súa religiun o porvia de d'atres gaujes. Te desses gní trat sò insciö che te es bun da capí i atri y fá amizizia cun porsones de d'atres cultures. Te desses te impegné por la pesc. Te desses crësce sò tla convinziun che al é important da se impegné por i atri.